

四庫全書

集部

欽定四庫全書

集部

東維子集卷十五至
十七

詳校官中書_臣孫衡

中書_臣劉源溥覆勘

總校官進士_臣繆珙

校對官編修_臣莊通敏

謄錄貢生_臣王宮

欽定四庫全書

東維子集卷十五

元 楊維禎 撰

記

借巢記

五十四借字誰借得

客有號鶴巢者自杭而蘇而松率假館以居予一日過其館改命曰借巢或有笑者曰鵲有巢而鳩借之鳩之拙也鶴不能營一巢而借亦拙甚矣乎楊子啞爾笑曰

子亦知夫借乎人一身外為長物物皆借也吾試與子
言借衣冠借以束身棺槨借以掩骼土石借以周郭山
嶽借以積土天地借以奠岳極之於大則大靈借以闢
天地何莫非借也近而言之琴筑借聲綉綺借色芻豢
借味鼎釜借烹刀刃借割壺豆借盛金玉借翫席借偃
而策借扶也車借駕而馬借馳也旗幟借表而弧矢借
威也印章借信而露布借令也權貴借勢而封爵借名
也遠而言之丹青借圖而金石借刻載書借誓冊府借

史而聖人百家諸子之文借以寓道也又何往而非借也及其親也妻借齊子借嗣父母借生而吾六尺之軀亦借也吁借乎借乎何啻於一巢乎或者起謝曰淺矣乎吾之窺借也吾因子言借而知天地萬有之不有於我也楊子曰吾於天地萬有皆借也而有不借者在何在也曰以天地萬有之借為借者萬有之客也以天地萬有不借之借為不借者不容於萬有之客者也子徒知吾有借而庸詎知吾不借之借而不容於客者耶不

客者誰曰問諸有物有物問諸有初有初問諸有無有無不可名全以名其巢居客起謝曰請書為記客為隴右邾經也

營丘山房記

顓之呂仲善氏早孤事母劉以孝聞長從鄉先生一靜謝公遊通易經以其餘力屬文賦詩頗有古人風裁方今天子一海宇招延俊乂善以異等才登選胄子學有書室在錦川之陽陽坡之下貯書數百卷題其顏曰營

丘山房示不忘其義於前聞人也出使于崧謁抱遺先生於草玄閣曰願先生一言以白吾志先生曰營丘在虛危分埜為今濟南地太公呂尚父之食邑也太公治齊舉賢而尚功至十四世為小白主霸以管仲富國匡天下而太公之澤益遠且大孔子曰微仲吾其左袵矣多其功也太史公曰太公尊賢智尚功能而其敝則夸奢虛詐而不情傷其俗也善欲振其緒於營丘而入值夫明天子之登賢以圖治其以仲之富國匡天下者為

勉而以俗之失不情者為戒則可謂善嗣營丘者矣善
謝曰請書為記戊申冬十月朔戊辰記

南漪堂記

華亭葉生杞家有林塘之勝在黃龍浦西蕭公津上讀
書之堂南臨之故名南漪杞謁予草玄閣求一言以為
志至四三而不已為之言曰昔眉山蘇子嘗有是號矣
而生之堂又襲之耶雖然齷其理之所得何嫌於齷耶
善言漪者莫如易之渙其曰風行水上渙此漪之極觀

也說者以為風與水相遭不能不為之文也此漪之說
文也予以為漪之所以為漪蓋有為之本者其可不知
乎今夫水由地中行源深則流長其發岷峨越崖谷衝
林莽傾折曲直束之為峽匯之為渦激之為湍瀑千變
萬態不可踪迹然後達于江河以朝宗于海有本者如
是哉苟為無本溝澮之水朝盈而夕涸求一漚之微不
可得奚有千變萬態極觀於渙之漪者也杞也有意於
漪其亦於本者求之否乎杞作曰唯唯

純白窩記

用聖經代老莊獨為高出

華亭縣北距六十里其聚為小菜其吳越裔孫為臯氏
先廬燬臯復新作又於堂右介闢窩一所上結圓頂下
方四落皆湮為雪色泥竇牖六又以雲母片翳之渾然
纒穹廬也名之曰純白臯嘗宿余於窩且徵純白誌賁
之上九曰白賁無咎以其反本也天下之文莫文於白
文之純又莫本於反本也吾聞臯壯年通經史及國語
間弧矢騎以義俠厠狐貉游徼問名貴人爭欲致門下

盜歷境臯呼鄉兵甲捍于淞之陰鄉賴以安又以白衣
參諮贊帥越者却寇酋復臺紀活遺黎數十萬今齒及
莫矣功亦茂矣假亦可體矣故歛其神于反本之地此
純白之所以名也臯有四子若孫者五皆玉立庭砌問
將有賦白華稱潔白于時者又知臯之反本貽世世亦
無窮也臯氏子孫尚勉乎哉至正庚子夏五月蒲節後
三日寫

薌林記

淞之邑帶江枕海聚為山者曰筓曰雪曰神曰小崑小
金地皆平疇大陸呀淵疏川突而高鬱而秀蟠而踞之
者則喬木之林大姓之所宅也去邑之北五十里其川
為蒲匯匯壯反為小菜岸小菜古屋百十楹者九齡徐
氏之居也去居左介一百步鑿池數十里池上植松栢
栢檜桂椒梅橘桃杏草則芝蘭菊芷荃蓀薰茝鈎連彙
列四時之生香未嘗一日斷也因額池堂曰薌林子過
海上九齡榻予堂者數夕臨分出楮筆曰先生海上還

嘻笑怒罵皆成文章醉墨所及一草一木有光於薌林
獨無言乎予曰草木之香細矣因人而馨者大且遠矣
哉栗里松柳以處士香晉竹林以七賢香濂溪蓮以茂
叔香羅浮村梅以蘇長公香草木不以物香而以人馨
也信矣不然雖梓澤平泉林木之綺交錦錯者不香也
吾愛齡之人品魁壘操行極高茂嘗與予論今人出處
曰今之稱豪傑者彎弧運槩走戎馬間水出火入即可
苟且頃富貴高者搥頰鼓舌閤聲高議以驚動所事自

謂陶王鑄霸以徼其所賓而為士之大慶不知大憂者
在其踵觸羅踏穿卒自跲踣而禍及其孥權不能庇勢
不能掖嘻若是者惜甚而悖亦滋甚予不幸抵難蹙幸
亟返故廬與一草一木同華而其實先人之賜先生之
教也予聞其言韙之曰此吾子之德馨也馨之被於薌
林草木者也故樂為誌薌林并錄其語為學之信且悖
者告也

固齋記

新經有鄉善士戴氏父者遣其子貞從予遊一日有請
曰貞承名於父承字於先生曰固而歲修之地未得齋
號以自勵敢請予又字齋曰固且求志予告之曰固非
高叟之固也亦非固我之固也乾之爻言不云乎貞固
足以幹事貞不固不足以為貞固非貞亦不足以言固
固而貞貞而固而後事之幹立焉故聖人許幹必於貞
固而不以亨與利也生學與齒俱進將入于官而有事
於政已以易之所固者植其本於不拔本而幹幹而枝

枝而花花而實伺之歲月不患其不茂且碩也生之貞
母替於固也復有喻生於固者唐城南諸社所居號居
社固以其風氣所聚也宗祖所族也子孫所完也後為
妬者鑿之血流者數日而固者崩矣杜抵固從而衰矣
地不可以不固如是矧君子之操行乎生力完所固毋
自鑿也

榆溪草堂記

至正庚子夏四月余東遊鶴砂回舟順流下黃龍浦又

東抵榆溪見大榆數百章皆百年物也雨餘新綠翳鬱
若屯旌擁握樹底構草堂一所堂主者陶中出迎客供
茗飲床書充屋棟茶竈筆床環左右又將客步後圃花
樹紅白刺人目折殿春玉桃花一枝供客是夜遂宿草
堂明旦干余記草堂之號周顒嘗構諸鍾山杜甫亦構
諸浣花矣然鳴騶入谷而山靈見移脫巾據床而幾不
免禍天下草堂萬萬也而享有其身者尠矣唯爾祖靖
節翁自彭澤來歸門種五柳著傳以自况義熙之節良

史書之五柳之德色者厚矣今子孫不堂柳而堂榆榆視柳等也烏知異日不有傳榆溪先生在龍浦之東如傳晉處士於五柳者乎中曰某不敏烏敢望吾前之人請記為堂以為警

槐陰亭記

三槐見周禮有三公之象焉宋王祐氏手植三槐而三公之位應于其後文正公旦君子謂王氏之槐種德之符也海東王敏中氏為三槐子姪槐之樹之間者亦三

結亭樹間扁曰淮陰大叅周公琦為作篆書之又介吾
門管生訥求余言為志吁王氏之子姓何其祚之遠也
祚之遠者德之長也晉大司馬府豈無手植之槐識者
占其樹婆娑而生意盡則知司馬氏之槐不如文正氏
之槐開其先者厚而蔭其後者長非尋常府寺之植可
得而並稱也敏中席槐之陰思有以培槐之本則豈徒
戒剪伐如齊人之令仁以根其生義以幹其行忠信以
要其成也盛德大業其有不光相門之植文正之堂庠

敏中勉之有以徵余言之不誣也至正庚子秋記并書
于挹清堂

春草軒記

有詩

淞謝伯理氏於其正廬左介為諺稽軒一所命曰春草
本靈運語也請予為之記予疑靈運以詩名宋而猶附
麗於人以覓句何也在西堂時詩思苦甚至假夢寐見
惠連而後得池塘生春草句遂以為絕奇吁此三百篇
後詞人以興趣言詩者也律以六義何有焉今人一草

木取以點綴篇翰極於雕鏤之工詩道喪矣談興趣者
猶以靈運語出於一辭直指如高堂多悲風明月照積
雪無俟雕刻而大巧存焉猶為去古未遠也伯理嘗與
予論詩大惡凌跨六朝直探漢魏故於春草有得焉雖
然伯理方將以詩備理教及於民豈必効永嘉詩人爭
工於句字間者具慶在堂上年俱高矣朝朝下音焉有
諭焉者夕夕焉有詰焉者於是家庭之教出焉倫理之
化行焉家有悅親之堂不忍一日違其色養吏部以品

推恩及其親自謂罔極莫之報時詠孟貞曜寸草春暉之句是春草所托又有關於倫理者惜永嘉詩人未之知也吾合以論見春之資於倫理者不獨在句字間也係之詩曰

草生西堂下沱水含清漪
鵲髮在堂上游子今已歸
大兒佩紫綬小兒著緋衣
嚴君親受禮慈母舊斷機
春草承雨露惟恐朝日晞
願持此日意永報三春暉

悅親堂記

謝氏繇陳留徙淞者代有文行為衣冠望族至德喜封
君養高弗仕生產益饒門第益大至正丙申苗人陷淞
封君廬亦毀明年復新作之其子伯理率其二仲奉親
于一堂晨昏於斯不使析處以一日去其堂予嘗名其
堂為悅親今來杭遂以記屬予世之以為悅者無大於
悅親矣子夏問孝於孔子孔子曰色難父母之色間見
於幾微者孝子迎而順之為難迎而順之為難者必孝
子有至敬至愛關於親者切若曾子之養志者是已孟

子不云乎悅親有道反身不誠不悅也誠者至敬至愛之謂也今夫備羞水陸備列聲色百拜上案於親者非悅也華服絺繡奇噐金玉寒更煥換於親者非悅也鍾畝阡連子本泉溢歲上券於其親者非悅也必悅之如曾子者而後可伯理事親尚友曾子悅親之道蔑有加於此矣雖然伯理方仕鄉郡出有民社之寄以其悅者身之昆弟循之而後國人因之所謂父子兄弟足法而后民法之矣理之弟曰恒曰鼎皆嘗從予游恂恂然有

古孝友之風吾知謝氏風教師於百世者有矣豈直國
人一時之法哉異日和氣應孝之門吾見瓢水之陽風
山之陰有同穎之禾併柯之木產焉田氏三荆有不能
婉其美者吾過封君堂上尚能為子賦之至正己亥秋
九月丙午記

好古齋記

鄉友俞猷仲桓通經術自命其讀書之堂曰好古來杭
請記於予予為之喟然曰古之不諧於今者久矣孰以

古為好耶三代下嗜好百出好酒而鍾以隨好傳簋而
牧以亡好勇而舉鼎以說牘好獵而隊車以墮首好游
而賈害以利好詼諧而售辱以戲好書而污髮以為顛
好畫而竊封以為神好鍛而倨以取禍好石而拜以取
喪好鶴而乘軒以取滅國所好不同而所失亦隨以異
惟好古為聖賢之學愈好愈高而入於聖人之域而凡
世之所好者不一足以動其志此好古効也今之人不
古好覆以好古為野譏髀無任恠淫不道逮至毀綱裂

常自謂行於今者橫如也不知步跲者在戶限外吁亦足省矣蓋孔子嘗曰先進禮樂野人也孔子之時已待古為野而孔子豈敢以野待古哉故曰我非生而知之者好古敏以求之者也仲桓之生後孔子幾二千年不溺於三代以下之偏好而獨追孔子以為古者而好焉非有聖賢之學不能仲桓今仕矣任民社之責矣以其好古者行於仕也吾見民之還於古而毀綱裂常者無以容於今孰敢以野議好古之古哉桓起謝曰謹受教

請書諸齋以諗夫議古之野者至正己亥冬十月初吉
記

尚朴齋記

太樸一散勢不極於文不止也殷質特尚猶本乎朴至
周文郁郁吾聖人不能不從時而救弊之僊則欲從先
進之野至用四代禮樂則取殷輅亦貴其朴耳使聖人
得位其不返朴於古吾不信也漢大臣師蓋公還治於
清淨無効至寧謐三葉之君又當率朴為天下先幾致

刑措此朴尚之効不可誣也維揚周信甫以尚朴名其
齋介松江守顧公謁記於予予未識周君而顧公稱周
君篤厚古君子務以一朴存心而待物又以之佐太尉
府收行簡之効則知周君傷時之懷欲返治於古其亦
慕聖人從先進者歟其亦蓋公之可師於漢大臣者歟
方今天子法漢治文之太尉菲食惡衣以承明天子之
化周君又以朴尚贊大府之政一朴之係於天下者大
矣朴名一齋固不得為周君私也故予不辭而為之記

其俾淞之能詩者頌之如后云

虛舟記

平原生居九鳳之山以虛舟扁其一室客有過而詰之
曰聖人取諸渙剡木為舟以利天下舟濟世之具也而
予以虛名之亦有說乎生曰余族居海墘見鳳壽粹作
佑容之舟兵人漕人之艦如山如雲胥溺沒於蛟鼉之
穴往者不可返而來者未已也嘗作吊溺文哀之而願
余之虛舟孰得而溺乎客曰予之虛舟將何載乎何適

乎生曰吾舟本虛復何載吾舟本徃復何適客嘗之曰
子之舟殆不如丈尺之朽槎乎槎神而能引客道天漢
遊牛斗間而子之舟何以自神乎生未知所對厓山鐵
道人在座莞爾笑曰客欲知夫舟之神且大者乎天一
氣也氣水也地一舟也地至重而浮游於一氣旋薄之
中未嘗溺也非至虛而至神能之乎客以丈尺之室視
舟亦隘已以大地之大視舟則舟之虛者六虛無以尚
之若是則果老之舟鐵務相之舟土絡南公之舟葉以

之稱神者末矣客退往生出楮筆請書為記生名曠姓
陸氏雲間人也鐵道人泰定間李忠介公榜第二甲進
士楊維禎也

五雲窩記

雲天地之靈氣其興也勃焉其滅也忽焉不可以色求
而色之變出焉或以青以黃以赤以黑而以同以三素
以五采而名亦隨之變偽者談五雲有以望而知帝者
之止占而知賢人之居夢而文章之進兆而知名進士

之出又托而為蓬萊仙境之求而未有命之於居者淞
之璜溪呂希遠氏吾以五雲名其居則亦有說希遠當
客杭從勾曲外史張公遊思其親不置外史為揭其所
寓曰白雲取狄公思親意已而歸耕溪上養母以孝聞
且廬其先墓林薄間曾見非烟非霧蕭索輪囷具五采
以燭人者吁此五雲之瑞孝感之應也吾得諸璜父兄
之言易其名為五雲因悼兵革以來衣冠之士逃離解
散至有遺失親而獨忍生存者若希遠氏之不忍一日

去其親奉驪菽水於流離顛沛之秋此非人瑞而何有人瑞而後有天瑞或者徒以占俟夢寐賦咏山坳求生之五雲者未為知生者也余故著其說錄諸窩為記

大竹軒記

潼川文同氏自館職乞外調屢歷郡守有治狀官至司封員外充秘閣校理其高情曠度類神仙人文章有丹淵集不在一時疇輩下顧以畫竹知名伎掩其人君子所惜在洋州時構亭簣簣谷為游息地故於畫竹益工

時作古槎老枿淡墨出神謂之墨林蓋非丹青家所能
匹也評其妙者謂其胸有奇氣歷十萬丈夫者非繆雲
間義門夏士良氏博雅好古蓄書萬卷外古名流墨迹
舍金購之弗吝於文人才士之圖寫尤所珍重居之西
偏有肅客軒名之曰大竹者有文同氏墨君之手澤也
士良蓄畫凡百十家而獨名文竹於軒非文氏之墨君
可貴三百年之清風雅節可詠耳雖然簞谷多偃竹同
特愛之嘗畫以遺子瞻氏曰偃竹數尺而有萬尺之勢

其詩曰待將一段鵝溪絹掃取寒梢萬尺長偃竹有不
可偃者如此與可以之子瞻以之士良之所藏作於簷
谷不簷谷不問顧亦問只尺之素有萬尺之勢不可偃
者何如耳士良仕志未伸必有得於此者不然軒之外
林林然麻生而棘立者皆簷簷物耳何獨以畫為貴哉
抑吾聞夏先人止知公有義荆圖兵餘圖與堂俱燬士
良更命荆以侶竹則又弗隊其先緒云

五檜堂記

至正庚子孟夏某日予過黃龍浦遊海上觀三神山經
南北蔡蔡之北者有大族婿者徐亨肅予至其家入其
門則深庭別院舉水天也已乃覽其園池之勝林木蔚
翳水石聯絡遂燕一堂亨拜手請曰堂未名惟先生名
予視堂陰五檜者東軒老人之手植也因命之曰五檜
堂又請曰堂既名不可無誌惟先生是措吾聞東軒老
人好修潔精於物理加之該博文史折節待海內士必
延飲五檜下人問檜則曰槐之三顯之必於天者松之

七隱之必於人者柳之五又出天人隱顯之外而以綱常之隆替為進退者吾之進退未嘗必於天亦未嘗必於人也天之所以與我者果不可必乎脫吾乘化而盡五檜者鬱然於庭使後之人見之豈不求之於五檜七松之間耶是則予之命堂以五檜或者東軒之人其有待余於冥數者是檜也歷已百年皆森聳奇崛鬣而鱗瘳而輪八臂九首而龍其身節甚貞氣甚清掌月而珠擎竅風而籟聲饗雪而鐵撐于以胚松栢之雲仍而要歲

寒之盟者乎言未畢亨起謝曰是可與五檜寫神已請
書為記

東維子集卷十五

欽定四庫全書

東維子集卷十六

元 楊維禎 撰

記

養浩齋記

淞之南陸氏代為衣冠望族有佳公子彥章者生而有
氣節讀孟子書至養氣之論深有槩於心輒自命其齋
曰養浩介其友郁彥學來見余璜溪次舍求一言為誌

予竒其人而為之言曰戰國之士以氣雄者多矣而未
有言浩然者獨孟子言之其氣即天地之氣也善養之
則吾之氣也至大至剛可塞乎天地其視北宮孟舍之
役於氣者僅匹夫之雄耳孟子之言是氣也人皆以為
夸千有餘年子蘇子者始信之其曰是氣也卒然遇之
王公失其貴晉楚失其富良平失其智賁育失其勇儀
秦失其辯蓋有不依形而立不恃力而行可以參天地
而闢盛衰者吁此聖人之能事也閱三百餘年人又疑

其言之夸而彦章氏者信之彦章不敢暴是氣而又得其氣養也故能處富貴而不淫居患難而不懼則彦章氏之用是氣入豈北宮孟舍之雄匹夫者可以同日論哉養之充也無一日之餒也雖聖人之能事不為難彦章聞予言而喜曰大吾養浩者先生之言也請書諸室為記且有以告人之疑吾夸者云

書聲齋記

余客淞游亭林尋所謂野王讀書臺者已夷為隧隴化

為草棘去臺之西北十里近為璜溪溪有義門夏士文氏歲聘文行之儒為子弟師六籍子史下及百氏之書凡數千卷皆架棟下頤為廡西之齋童窻鴈次蚤夜諷誦聲徹行路因名其齋曰書聲而求誌於予余聞魯恭王入孔子宮聞金石聲而宮不壞漢高皇過魯聞絃歌不廢而邑不殘書之聲感人也如此孔子之武城莞爾絃歌亦為子游喜夏氏書聲聞于承平之日未為奇也而聞于兵戈格鬪之頃非一家之曲阜歟吾為吾道在

東之廢慶已雖然士之讀書也內以治身外以治人沈
潛其中之所得以究觀道德之微性命之懿以極夫禮
樂教化之著胥於書乎出也豈直務聲而已哉不然誦
習之日積極詠之弗知則其書之有聲聲於出口入耳
者雖工於浴生之詠吾無取乎爾矣士文尚以余告勉
諸弟子師師以余言勉諸弟子云至正庚子秋八月初
吉記

著存精舍記

璜溪呂孝子曰恒曰恂塋其考君來德公于漂水之原
治冢域如法冢前甃文石壇及隧道樹以椿桂枯栢又
並冢為精舍以奉春秋祭祀祀必親眡牲器不以屬人
俯仰齋慄如親見其先之亨者雖歲月去遠為之悲慕
不已名其舍曰著存參政周公琦為篆諸扁以記請於
余世宜墓祭非古然孔子冢孔里魯子孫世祠其冢不
廢則墓祭有所祖矣自廟制廢而上冢之禮重乎漢
人史傳書以為孝子之榮近代卿大夫官擬王者而祖

禰神明之舍則漫不加意至有即宦上以為家遂棄墳墓千里外過家上冢者亦罕矣淫昏之鬼則祀之如其先不以為恠烏乎俗之壞而士大夫之不振若是幸有神位主於冢舍時節不失其所祀授古祭義致愛致慤以存著其所不忘如呂氏兄弟者蓋寡矣又懼其易世而著存者替籍恒彥以垂其規於遠久俾勿壞豈非世教民彝之在猶有所繫哉是宜著存之可書而呂氏兄弟之事為可錄也予方提學傳司禮之廢者將與士大

夫講行之呂氏兄弟嘗從子學者也尚以子言力返廟制使四方觀禮者於呂氏乎取法而士大夫之復禮者自呂氏始豈非予之所望乎至正庚子春正月八日記

西雲樓記

雲間李氏以西雲銘其讀書樓求志於子子曰爾家騎鯨公夢長庚而生長庚西方白虎七宿也故名白字太白太白以星言今不以星而雲言何也則亦有說在易之小畜曰密雲不雨自我西郊彖曰密雲不雨尚往也

自我西郊施未行也雲之積不厚不足以澤物小畜為卦以風行天上一陰亢五陽所畜既寡施何自而行耶西郊之雲施雖未及於物尚往而不可止也故上九曰既雨既處尚德載物德積而施行如上九之積厚而雨降事業蓋未易量也抑余於天人之事有感於西雲者西雲儒而通天文學者也今太白食昴西方事也天狼獨步東南白虎伏而不動九旂掩旗七將斂手縣弧服矢不敢東向而射者十年于茲矣妖氛奪奎璧熒惑守

井鬼太陰宿室畢之墟太陽食已未之月亦西方事也
下民所不忍仰眎西雲計何出撫髀歎曰願以先王之
學上從六龍以飛庶有以霈洗天之澍於東南也先生
姑俟之至正庚子立春日戊戌記

野亭記

有詩

雲間沈鉉氏世家為郊關之外其聚為溪之上皆壙垠
之野於先廬東介披蓁巖時花竹築亭四楹中置文竹
榻白木几葦床茶竈棋枰書度雜聚其次時與一二同

志友鵬詠其中顏其亭曰野集賢趙公雍為作篆善之
又介吾友陳栢謁余七者寮求記予謂野非直郊外名
也聖人嘗以比仲由而又欲從先進之野蓋野而畔教
聖人所嫌野而勝華聖人所取鉉之野何居鉉曰某之
野郊外之名耳烏知聖人之去取哉雖然聖人論野為
質鉉將論野於趣乎趣乎非樂處於壙垆者能知乎唐
丞相裴公嘗堂於午橋而名野矣是厭政於朝思野於
野豈真知野之趣哉知野之趣莫益真曜氏魏仲先氏

若也鉉不敏將尚友於孟魏氏云予題其言又重栢之
請錄諸亭為記繫之詩曰

孟郊得野趣野有真曜廬魏先得野趣野有野堂居雲
間沈東氏草衣傲野夫東屯田可種西壤水可漁門無
索租吏家有種樹書野亭開草樹野具集朋徒試問朝
市宅傳舍不須吏朝恩來鐵券莫死已屬鏤始知野亭
野廟堂如不如

野政堂記

松中張氏海道相門參政公之三菜孫學優而不仕自
號一村人顏其所居堂曰野政予過松中有請曰唐陳
弘嗣嘗歎漢王丹之化行農野舉聖人之言曰是亦為
政奚其為為政弘嗣隐居武山歲辟良田時乘平肩輿
訪田更餉田畯白露時降新穀既登則崇禮教親九族
驩鄉黨鄉黨有媮衣苟食佩刀劍從事乎推埋肱篋者
皆耻而弗為弘嗣氏之化蓋亦不小於丹矣予竊慕之
故於耕舍扁野政幸先生有以言之予聞中父仲甫公

能以孝友理家而中有克以野政相之君子之談政者
豈必被三公服坐政事堂發號施令然後為政乎政之
出於野者覆優於彼之失於官者失官而失士失士而
失民遂至於失身其於無葬地也而中之優者無間於
昆弟之言無遺於宗族鄉黨之譽委貺於後之嗣而並
光於前聞人絜諸執政之失者其相越豈不萬萬乎陳
子昂推弘嗣於龐德公鄭子真之流為作者五人之列
若中者吾又將問之於五人者非當歟中謝曰吾志弘

嗣敢望龐鄭請書諸舍以警云至正二十年二月初吉
記

尚志齋記

孟子曰志者氣之帥也氣有猖狂暴悖人不得而制者
唯志足以制之其闕冗衰退不能自立者亦唯志足以
率之故又曰士尚志士而不尚志其不為猖狂暴悖載
而遷闕冗衰退靡而沒者幾希矣訓詁者曰尚如尚服
尚車之尚蓋尊而主之之詞也然人之志有不一也論

者以志道德賢人之志上也志功名壯士之志次也志貴富鄙夫之志其下也然則志貴於尚而志不可以卑之而下也夫多岐百出而南車壹志之趨也萬物俱流而金石獨止志之定也志失其趨何以尚為不失其趨然而弗底于定又何以尚為吾北門之外有青年而好學者曰施用和生長市闌不與其習俱而獨從儒先生游博習文藝修省履行且以尚志名其讀書之齋予嘗領客邸齋所市聲在門市言在肆而用和秉志弗遷修

習於其齋者自如也非其志之不失其趨而底于其定者哉吾知用和之克尚志不卑而下也信矣第未知賢人壯士之所決何如耳用和曰功名時來則應之人無予我無取也道德者聖人之能事吾所為志之始而終焉者也吾為之交手在額曰懋哉用和推是志以往然而不入於聖賢之域則吾不知也用和出紙求識齋遂書為記復繫之辭曰

氣易我移匪志曷持道難我至匪志曷之既持其移卒

造其至尚其有大於斯者乎

朱氏德厚菴記

華亭縣朱涇西其里曰大興有林麓魁然竒蔚然秀北帶
乎九山前襟泰川葦泖之流環連壁合鬱葱之氣不沈
不越而物有鍾美朱明仲之祖塋實在焉自大父誠父
顯忠祖妣沈氏妣丘氏庶母氏氏皆合葬其所明仲既
奉大事于其先復立冢舍若干楹捐田若干畝命廬塚
者掌之以供歲祀事祠曰昭明昭其物也齋曰肅敬敬

其事也又奉聖人終遠之訓總命其冢曰德厚尚書公
泰不花氏既為篆而顏之而又介子韓生奕來謁記子
為之喟然曰崧國地無高陵燥壤為民之終

管子陵為之終

往

往人終其親不諸水火則寄諸浮圖氏之室雖衣冠仕
族或有不免豈復以先德為念而戒懼於其終與於遠
耶間有權力家知治丙舍以為薄俗之博大抵文有餘
而敬不足至闕其珠玉華其藏不惟亡益於教句誨人
以奸貽神以戕吾不知其為厚也仲明儒者也知聖之

教而奉以罔墜終易忽也必慎以存焉遠易絕也必追以屬焉欲報之德昊天罔極吾心以之休惕以之焄蒿悽愴者皆天也吾心之天不沒于是則吾親亦不沒于是朱氏之慎也追也天於已而持以為訓也天於人朱氏之德吾知其可以惇俗之薄矣抑聞朱氏之先理家以義方為首故每焚香禱天不願子孫富願讀書而賢仲明又喜聚書不遠千里聘碩師教二子雖盡傾橐金弗以計其心可以對其先矣今老矣而修德弗勸德益

厚而福澤益潤朱氏子孫其有名世者作矣矧其教之力乎立身揚名以圖其孝之大者以報德厚是在朱氏子孫吾未老尚及見之以徵予言之不誣也已丑春三月記

碧雲軒記

四明俞南浦氏僑居雪上有才氣而不仕靜讀書於一軒若無心於世者而聞天下之魁人傑士則不遠道里願納交焉其所居軒自號曰碧雲嘗得待制清碧松公

所隸古書一紙而又謁予為之志夫雲天地潤氣也神
龍挾之以飛不崇朝可以雨天下然其慘舒消息不恒
肖象而變幻者不一如輪如騎如旒如蓋如流水積石
如赤鳥白鵲蒼龍玉虹之狀萬萬不可究極自其忽而
逝倏而還翩然而颺凝然而止則人且目之曰閒雲突
馬如峰赤馬如火費雷霆之軀第空林樹之俟望則目
之曰旱雲至其引而自高於風塵之表海島之間非烟
非雲作為光恠以動盪人目則又曰卿雲綵雲三素五

色之稱而碧雲者則五色之一耳嘻天下蒼生顚顚焉望之作霖以甦枯注涸也其於碧雲也何有乎何無不知世有長往志登高眺遠俯仰今昔或有疑佇所思於交際契濶之間者必於碧雲以見之南浦氏不仕而有高世之志而又喜交天下之魁人傑士其悠然之意不在是乎抑予聞南浦有道術二十八宿在胃窟者時出而化為麒麟鳳凰蛟龍狼犴狐狸鳥雉之物遊戲碧雲光恠中為人談天下之吉凶悔吝聞之者推為神人則知南浦之碧雲非塊

然天外物也今之士有食人之食而急若事惟便利其私
圖自謂得計而不知天羅及焉又有奮草萊出大言亡治
狀冒儋珪組以充醢具者其紛起未已南浦民見之其亦
俾二十八禽飛而語之於碧雲萬仞之下其可也南浦咲
而援琴於軒曰吾目且送吾雲矣焉知許事

松月寮記

去秀之西門外州里所其聚為濮市濮公子仲溫氏之
世居焉居有前後邸第義庄塾以教養里之才子第仲

溫自幼從師學明經既通尚書後學易又從余學春秋
兩充鄉賦連不售適又丁時變遂去道士冠裳尋山澤
間欲挈妻子為鹿門之舉事未遂則闢寮一所植松數
章高秀蒼古若深山木客之出在市廛仲溫彈獨絃琴松下
嘯咏若友焉天清氣明月在松頂仲溫彈獨絃琴松下
琴餘讀道書作遊仙吟不知身世在黃塵市在白玉宮
闕也遂以松月道人自號雲間盛懋氏既為圖之而又
寄自作松月詩一解於余徵文以為記予為論積陰之

氣清而久者在天為月麗月之清於物之秀者在木為松桃之得於月也清而妖柳之得於月也清而盪梧之得於月也清而婁梅與竹之得於月也清而癯惟清而秀秀而已野者松之得月以此然得松月之得而見諸名人者自唐常建後未聞其人焉建之詩曰松際露微月清光應為君嘻此建之得於松月者未易與俗人道也去之五百年而仲溫氏復得見之得而其詩有曰犬人夜開闕涼月在松頂此其得於松月之得者奚減建

也哉嚮使仲溫氏蚤時壅官或至五年十年即不壅不
過汝趨隸唯以奉所氏志不直達而性先有損其及人
境兩泰哦松哦月而有得哉嘻仲溫氏之彼此失得其
有能辨者已書諸寮為記至正十三年七月七日七者
寮諸叟記

有竹人家記

安陽韓君諤築室於所居之浴鵝沱上左右皆植竹因
顏其室曰有竹人家一時名士大夫咸擇行輩交其人

至或載酒有以抵其所吳興趙雍為作小篆之書又為
作入家有竹之圖余既賦詩圖之上復遣書再四以記
請宋蘇公軾曰不可居無竹無竹令人俗至拄杖敲門
尋有竹人家吾不知有竹之家皆能真有其竹而免於
俗者不也嘻公之得在竹耳固不計人家之俗不俗之
能有不能有也今韓君之家自命曰有竹吾知其能有
竹矣一妄庸夫曰有竹居而竹不為其有也吾試詰其
所有則謾言曰吾擊竹而歌不啻擊珊瑚也披竹而咲

不翅披琅玕也簞筠而臥不啻茵虎豹煮萌而食不翅
庖羔豕也嘻有竹如是夫人而能有也吾觀韓君虛中
抱道有竹其心貞標絕俗有竹其性善建不拔有竹其
本離立不輒有竹其朋德音協鳳凰或思沾露霜又有
其應律之聲格瑞之靈也韓君之有竹若此其亦異乎
人之有者乎不然韓君之家與妄庸人者同曰有竹而
竹不為其有也雖渭川千畝之富徒以等燕秦之粟林
齊魯之麻枲而已耳竹何有於家而家又何有於竹哉

然則韓君之有竹不徒在其家也諗矣書諸室為記至
正十三年九月十二日

春遠軒記

余曩居會稽於清明之春登秦望蓬萊諸峰望數千里
廣輪際海而止一鱗介一條絲與都人士女靚粧麗服
生長太平山川間孰有荒陬遠鄙之間因憮然嘆春之
遠後計偕上京師得歸遊覽度居庸陟龍虎臺下視齊
魯晉宋荆秦吳越之虛民物熙然如在春臺者了無畔

岸余復嘆春之尤遠殆與我皇元聲教同一遠也自淮
汝兵興南北旌旗相望於千里百里斥候之次給儒而
行即抵牆壁思昔之週四方跨八表窮目眎足力弗既
者不可得已雖然不遠者提封之迹也一氣為春者豈
不遠哉知春一氣之遠則心之有春者未嘗不與之遠
也雲間鍾和伯溫築室于山之東麓顏曰春遠請記於
余其亦有感於今日之春而不計其地之遠近者歟不
然杜少陵嘗言春遠矣何獨於柴荆見之歟是為記至

正庚子五月朔旦東維叟書叟者李忠介公榜賜第二甲進士今奉訓大夫江西等處儒學提舉楊維禎也

春水船記

滄水主人壯年桴于海晚家居結樓滄水之上蓬然若舟海水時抵階下放目樓上一白萬頃人眠其蓬然者一葦耳因命曰春水船主人垂釣于枕濯足于床波與天上下渚鳬汀鴈之相因依不知船在水耶陸也酒酣仰臥其上家童數十善為越人擁楫之歌主人又自歌

小海為舉足扣舷以節之水光天影飛動几席籟聲與
潮汐作殷殷在足底滄洲仙有駕凌風舸以激水如箭
者彼徒以舸為舸而未知吾居之以不舸為舸也以為
舸則未嘗去家以為居則嘗有行色也朝吳編莫越戶
心無適而不可入孰知吾船之纜之而住負之而走也
昔者太公嘗以漁釣欺天下而天下施知之其舍魚也
欲蓋而彰也嘻以為非漁則持竿五十年矣以為真漁
則未嘗得一魚焉嘻太公固得於漁不漁之間者容詰

主船以為真船則居陸以為非船非簞笠之前皆漁樵
推罵之地又安知吾之在樓非長乘舴艋也今夫天一
大春水地一大船也人在船不悟悟者必在船之外吾
悟船獨不在外也嘻此不可與家人道也春水如天船
在天耶水邪而況在樓邪認吾船在樓入何異認劍在
舟刻耶其扣舷之謠曰滄之水兮如天叶滄之屋兮如
船舷水滔天兮以春船之載兮薄夫天津索吾船於津
之表兮吾得與泰初而為隣客和之曰若有人兮舟為

家^十著土不住兮養空不驅泰和我海兮鴻龐我湖吾
不知貫月槎之徒兮天倪舟之徒歟主人為汝南殷德
父氏客為鐵遂道人會稽楊維禎也至正十年春三月

三日記

松月軒記

有詩

積陰之氣清而久者在地為水在天為月也木得水而
清之象滋焉得月而清之氣麗焉月一也木之麗其清
者其材品則有不能不異者也桃之得於月也清而妖

柳之得於月也清而蕩竹之得於月也清而臞梅之得於月者清而孤茶蘼海棠之得於月也清而怨惟清而墊而又秀也松之得月以此吳郡西門之外其聚為吾閭闔之閭夫差王夏駕之所也五方大估咸輳焉為積居之家者比比耳獨吾鄉人吳彥昇氏居不離市而門有散地數十弓上有青松數十挺高秀疎朗若深山客將儔挈侶出飲乎市而盤礴于此也天空氣清月在松頂彥昇或領客坐松下仰見閭搏根株盤白玉兔白人

世斧斤不可斲已而顧影在地萬籟在空鈞韶鳴而龍
鸞舞也不知身在此玉闕中與黃塵市訖有得於松月
者名於其軒少蓬李公嘗為圖之大蓬泰野公又為篆
額之又求文於予予以素為里閭不敢重違其情而彥
昇之人品才氣可以仕而不仕者與夫尊師樂友化龍
斷之俗翕然於禮義之趨者又吾之素與故為之記且
復哦以詩曰

丈人愛青松手植西門內風聲度玉笙林影翻朱鷺仙

鬼夜讀騷木客秋吟句丈人燕坐餘海月生東樹

水竹亭記

吾里白湖方義門子弟咸秀傑名仕版而予泳道父其尤者也始泳道未遇貢舉時實以才志自奮於京師貴人咸品之連延譽上所即被內選出司牢盆民奏寢典大縣細滿歸荆水竹亭先廬奉親之隙出與賓客接幅巾野服命僮抱琴尊之亭所相與把酒說詩父為事窮亨淹速一不以屬意一時文章家多為記詠為既充

又索叙引於友人楊維禎維禎嘗聞其論曰某讀南史
書稱會心不必在遠翳然林木即有濠濮之趣未嘗不
嘆以為縉紳閥閱豪族大官捐千金買佳園池崇美屋
其中育以珍禽奇獸樹以名卉異木論其一時侈盛平
息侯之甲第無以喻其雄河陽梓澤之形勝無以喻其
浥也然欲求一日之安於是不能得也故予一亭費甚
約規甚素取諸水竹者甚廉而其適安之樂自謂過之
百倍不翅也人有志於適安者不敢如是耶余以泳道

之言似矣又將有進於是者何居夫高尚于埜以草木
水泉驕其君而不出者狷者之為也既得志而患失之
退以竊狷者之樂以為樂又媮者之為耳媮與狷皆中
行所不與泳道於道務中行則狷與媮不足告泳道者
今夫水散也有雨之德焉積而厚也有負載之功焉君子
觀於水也思夫澤施於物者竹有貫歲之節不易地之
性焉君子觀於竹也思夫貞一於己者若是則泳道之
登高也取諸物以贊乎已以及乎物至矣又豈徒草木

水泉之適云乎泳道尚以余言思之以為何如也

東維子集卷十六

欽定四庫全書

東維子集卷十七

元 楊維禎 撰

記

小桃源記

淞隱君陳衡父氏世家在泖環之西既遺其子東西第
又為園池東西地間仍治屋廬其中名其堂曰清暉樓
曰明遠而又額其亭曰小桃源也予嘗抵桃源所所清

絕如在壺天四時花木晏溫常如二三月時殆不似人間世也隱君且舉酒屬余以記請余聞天下稱桃源在人間世者武陵也天台也而伏翼之西又以小云據傳者言則武陵有父子無君臣天台有夫婦無父子也方外士好引其事以為高而不可以入於中國聖人之訓矧其象也暫敞亟闕其接也陽示而陰諱之使人想之如恍惚幻夢不能倚信雖曰樂土若樂彼吾何取乎哉若小桃源之在隱君所也非物引諸八荒之外人有親

以職吾孝也出有子弟以職吾慈友也交有朋儕戚黨
以職吾任與嫻也子孫之出仕於時者又有君臣之義
以職吾忠與愛也桃源若是宣傳所述武陵天台者可
較賢劣哉然而必以桃源名者張留侯非不知赤松氏
之恍惚也而其言曰吾將棄人間事從之遊知之者以
為假之而去也隱君亦將假之云耳隱君齒既暮而老
將休矣桃源其休之所寄乎而猶以小云如伏翼者小
寄云耳固不能絕俗大去已或曰淞俗信仙鬼貴富家

有駕海航翼風一引至殊島見瑤池母東方生乞千歲
果啖之而隱君弗能從此小桃源之名於淞也併書為
記

松室記

松江朱子肩於其先廬之左治讀書之室環植以松故
命室曰松今且寄居於東山氏之西廡而未見偃蓋之
植也則命畫史圖居之松以謁予泖上曰此其之所謂
松室而讀書誦詩於其下者也願有記焉雖吾遠去其

鄉得展圖攬記將不悼其身不在松之室也予詰子胥
誠何取於松豈子受性也獨正抑有心也貫四時而不
改厥撫乎將森森千丈施之明堂大厦有棟梁之材也
抑產茯苓結靈實辟百穀而食之可以飛行如偃佺之
倫乎將異時托之洒掃使家之人識其指之在也抑要
久歲月精與化通為青蛇為赤龜以怪駭人間世乎子
胥曰余孔子徒也非仙釋之流予絃誦於松室之下知
聖言有松之為歲寒物也如其心而不改柯易葉也吾

烏知其他雖然余幸而生文明之代知學孔氏學而切
有得於誦余之立志豈不欲淑諸人而達天下也故嘗
夢松焉吾十八年其抑將為公也邪子筭子月明年為
六十人更十八寒暑為太公望之齡夢松協於夢熊則
吾將迎子於海之濱江之上矣子月莞爾曰吾與其為
十八公吾寧為主人七松至正九年十月一日記

夏氏清潤堂記

雲間義門夏景淵氏居同邑呂公之甥館其館之中與

曰清潤蓋取晉人名樂衛翁壻語也予與景淵為昆弟
交既得翰林學士泰野公書其額而遂求誌之文於予
予惟物之清莫踰於水詩人曰清如玉壺冰是也器之
潤莫踰於玉傳者曰溫而澤是也故皆得以比德君子
也當典午氏之世行者方以放濁為通居者專以揚寂
為記究求時君子比德於冰之清玉之潤者鮮矣評者
以樂衛當之吾嘗探其人焉誤晉天下者多清談之治
術而廣與王夷甫為清談首位極於台揆竟以殞瑩然

冰鏡之照人者吾不知其與澄胡母輔之輩相隔幾何
衛叔寶自幼美風神見者以為玉人中興名士推為第
一而卒無掇於名教之敗至於徙家而南再獲美妃終
天厥生玉振江表比於金聲中朝者王輔嗣同一寂寂
吾又不知永嘉之末曰正始音者何取正始哉二子之
不能不愧德於冰玉者類此吾客呂公仲氏家親識呂
公之為人高居潔已行無瑕類不與惡人交不與狎士
游侍其坐朗然明月之照席也可謂善清也已景淵天

質純雅有大器量而不苟於小仕與之交昭昭然若飲
醇酎可謂能潤也已以廣玠之所名名厥居廣玠忝於
時評而景淵氏之翁婿豈有醜也哉雖然清莫清於不
自掩其疾潤莫潤於及物之大冰之出壑潤徹中表而
瑕不自匿此其清之至也玉之在山土石草木皆蒙清
輝此其潤之大也呂公之清吾知其至矣景淵氏之潤
更以其物之大者推焉則光映清門於弘且速者非義
門之傍澤歟景淵氏曰善敢不勉諸請錄諸堂為記

賓月軒記

呂輔公之長子名恒字德常其燕處一室在居之西偏
名之曰賓月嘗觴於其所遂以記請余讀堯書命羲仲
之文曰寅賓出日又曰寅餞納日以賓餞之禮禮日者
謹昏旦之候未聞以月然在帝文告厯日月而迎送之
則月亦在所賓矣吁此厯家說也非吾達士之所賓也
吾達士所賓自眺蟾主人賓於景祀之上月固未受其
賓也而况黃星小兒欲窺於南鵲之枝乎况苔閣鹿櫺

欲以脂粉邀之乎又况霓裳之聲帶輦鼓而欲假仙遊
以即之乎是皆賓之以為主也惟庾武昌之據床劉晉
陽之清嘯李騎鯨之舉杯相屬杜少陵之戀戀貂裘粗
賓主之一遇耳嘻賓常有也而主不常有茲數人之後
何其遇之濶如也五百餘年而賓主之交始得於德常
氏可以見遇合之難矣吾愛德常人品光霽尤愛其為
量靚深時吐章句流麗娟好吾知月之愛德常而適以
為主無疑也或有嘲曰德常賓月月主德常主無異情

矣而賓也有雲雨之翻覆圓缺之差池奈何德常曰爾何窺於賓主之淺也先天不稚後天不老者非全月歟而吾神未嘗不與之俱求吾賓者以神不以形以形賓在賓主在主以神則吾蓋不知賓之在月而主在吾矣尚何以主客異邪或者曰然書諸軒為記

春水船記

滄水主人壯年掇於海晚家居結樓滄之上蓬然若舟海水時抵家下放目樓上百萬頃人眠其蓬然者一簞

耳因命曰春水船主人垂釣于枕濯足于床酒甘輒笑
歌其上家僮數十善為越人擁楫之歌主人又自歌小
海為舉足扣舷以節之水光天影飛動几席籟聲與
潮汐間作殷殷在足底不知船在水邪陸邪滄洲仙有
駕凌風舸以激水者徒以舸為舸而未知吾居之以不
舸為舸也以為行則未嘗去家以為居則常有行色又
孰知吾船之纜之而住負之而走也昔者太公嘗以漁
釣欺天下而天下旋知之其舍魚也欲蓋而彰也嘻以

為非魚則持釣竿五十年矣以為真魚則未嘗得一魚
焉嘻太公固得於漁不漁之間者客詰主船以為真船
則居止以為非船則箬笠之前皆漁樵推罵之地又安
知吾之在樓非長乘風舸也耶今天一大春水地一
大船也人在船不悟悟者實在船之外吾悟吾船獨不
在外也嘻此不可與衆人道也春水如天船在天耶水
耶而況在樓也認吾船在樓又何異認劍在舟刻耶其
扣舷之歌曰滄之水兮如天叶滄之屋兮如船叶水滔

天兮以春船之載兮薄夫天津索吾船於津之表兮吾
將與泰初而為隣客和之曰若有人兮水為家叶著土
不住兮養空不驅泰始我海兮鴻龐我湖吾不知貫月
槎之徒兮天倪舟之徒歟主人為汝南殷德父氏客為
鉄遂道人會稽楊維禎也至正十年三月二日記

碧梧翠竹堂記

至正八年秋崑山顧君仲瑛於其居之西偏治別業所
架石為山竅土為池層樓複館悉就規制明年中興之

堂成顏曰碧梧翠竹廼馳數百里記於友人楊維禎曰
夫堂矚金粟階映桃溪漁庄草堂相為僎介蓋予玉山
佳處之尤宏而勝者也鴻生茂士為予記詠者多矣茲
堂之志非名鉅手不以屬敢有請予謂仲瑛愛花木治
園池位置品列曰桃溪曰金粟曰菊田曰芝室不一足
矣而於中堂焉獨取梧竹非以梧竹固有異於春妍秋
馥者耶人曰梧竹靈鳳之所棲食者宜資其形色為庭
除玩吁人知梧竹之外者云耳吾觀梧之華始於清明

葉落於立秋之頃言歷者占焉是其覺之靈者在梧而
絲絃琴瑟之材未論也竹之盛于秋而不徇秋零通于春
而不為春媚貫四時而一節焉是其操之特者在竹而
籩簞笙簾之器未論也淮南子曰一葉落而天下知秋
吾以淮南子為知梧記禮者曰如竹箭之有筠吾以記
禮者為知竹然則仲瑛之取梧竹也蓋亦徵其覺之靈
搯之特者書以為取諸物者法毋徒資其形色之外云
也子韓子美少傅之辭曰翠竹碧梧能守其業者也徒

取形色之外而不得其靈與特者未必為善守仲瑛氏
吳之衣冠舊族也有學而不屑於是茲堂之建將日與
賢者處談道禮義以益固其守者其不以吾言取梧竹
乎書以復仲瑛俾刻諸堂為記

槐圃記

按周禮朝士面槐三公位也槐何取於三公哉豈其畫
鼎宵炆一陰一陽之翕闢而燮理之道見焉故公所多
植槐齊之君主有犯槐之樹也列公所尊異乎羣卉而

不可與凡條繇植于老農之圃者比矣故宋王祐氏手
植三槐于庭期其子孫曰吾子孫必有為三公者已而
旦果相太宗天下謂之三槐王氏吁槐之植私庭而遇
如王氏者天下亦尠矣北庭文甫氏家于杭之清波門
自其祖叅政忽撒公樹槐三章于居之後苑稍治園亭
其中名之曰槐圃文甫氏彈琴讀書或與客觴咏必于
圃之所時時與客撫其樹曰嗟乎是吾祖之手澤也予
後之人弗克負荷惟懼其敢不封植是樹如昔人之無

忘角弓者以無忘吾祖者耶客至圃者愛其人必敬其樹知其祖之待文甫氏者遠且大也且咸為之賦槐圃詩吁文甫氏能思其祖愛其手植若是其孝於家者可
知矣以其孝於家者移忠於國其光於祖者又可知已
文甫方強年承叅政公之澤將以六品秩仕于朝矣吾
嘗交其人識其負大器且執謙而好學忽氏子孫之為
三公者豈下王氏哉異日文甫居高位面庭槐若見爾
祖之手植也有不惕然哉槐以人而名則圃以槐而重

矣天下謂之三槐王氏者不屬之三槐忽氏惟文甫以前人之所期天下之所望者勉之而已至正己丑九月九日記

光霽堂記

宋黃庭堅論春陵子周子之人品曰胸次洒落如光風霽月談人物於孟軻氏後者子周子也太極通書之著異乎莊列荀楊之撰不由師傳根極道要以接夫千載不傳之緒由其人品之高也擬諸形容者無它風月之

光霽而已耳後世不識周子而求其人於光霽可以識
其人品焉雲間任公子元朴開池於廬之西偏蒔花竹
其中而命其堂所曰光霽因友生馬琬求記於余余謂
元朴之光霽其慕子周子歟抑自胸次式符於子周子
歟嗚呼一歲之晝夜非無風與月也而得諸光霽實難
今夫蓬蓬然而發乎噫氣掉乎無方迹之而無形聽之
若有鳴谷乎若盈流手乎若行者是風也而光實形之
不光無以見風之至祥也晶晶乎行乎太空泰清乎天

中轉之而不窮蝕之而不訐死而胸灰而眇眇而中者
是月也而霽實旌之不霽無以見月之至白也風之光
月之霽蓋神之至秀而時之至良也已勝人韻士韶暢
高明洒然凡塵之表者不似之乎吾於是有感矣風月
光霽少而翳冥多也人光霽少而幽陰多也世代光霽
少而屯否多也元朴光霽獨取諸造物之多得之心而
應之境誦詩讀書暇而彈琴握槊與客觴咏以為樂而
不知世間萬物有倅然而不適其情者嘻風月在世常

也而堂獨以光霽名之是雖晦冥陰雨相尋於無窮而
吾未嘗一日不光霽也吁夫人而似乎元朴也子周子
不足慕而已世道之否者可以復泰和聲明之盛於古
也客聞吾言有喜而為之歌者曰有光雖風有霽雖月
我思其人憂心惛惛既見其人我心則悅又歌曰光之
風兮英英霽之月兮庚庚風與翔兮月與萌君子之心
既清且明君子之樂式和且平繫子仕子莫之與京

雙清軒記

華亭南去五十里為胥浦浦之東有隱君子居焉曰倪
益齋氏吾嘗聞其人而不及見之今年予至胥浦而其
人已隔世見其二子皆孝睦其家孫曰權者尤才賢而
善接師友權之舍客次曰雙清軒以予為右客常禮予
以顓席予亦時時領客造其所不問主在無一也權與
父伯玉君聞予至急治茗具茗餘繼觴咏已而相與抱
琴至雙清所當秋月正中八牖夜闌游塵不興草樹可
數為予援琴三鼓始以長清短清申之以御風騎氣其

聲汨汨如泉走絕壑如游雲行太空如珩璫相觸於升降揖遜之頃疾徐高下靡不中節蓋月在琴得月而愈清軒之名雙清非此耶權既與客賡唱雙清詩而又屬余記余愛權之賢其有志於樂道者歟惟樂道者而後忘世俗之樂故其心洒然與迹俱清不徒琴與月遭而後得是清也世之層臺複館貯粉黛茫笙竽與淫朋狎伴為留連荒亡沉溺而不悟者彼豈知天地之氣之清有託於物而存者乎而倪氏容膝之室無黷墜丹漆之

麗其中惟經史圖畫一二古鼎彝器而已方其適於清也衆喧俱息百慮皆消方寸之間湛然無世間一物之異此非誠於樂道者能之乎不然吾思權之清也當琴與月遭則暫之於月落琴移之際則失之譬之泉焉渴飲而甘之而不能不為醇酎之奪於異日也可不思哉權起謝曰權或叛先生之教有如月舉酒屬客而自為之歌曰氣之清兮魄之陰器之清兮絃之琴維軒有月清明實臨維敕有琴和樂弗淫我歌雙清實獲我心併

錄之以為記

邵氏有竹居記

松地隸古揚域厥土卑濕沮洳自禹決水注之海然後
民與草木得休養生息其土性最宜竹禹貢所謂篠簜
既敷可徵也去松之南六里所有村曰同安仲謙邵氏
居焉邵氏自靜山君由伊維徙湖之長興復自長興徙
茲邑仲謙即先廬斥而大之左右皆植竹因顏其室曰
有竹居翰林承旨張公夢臣嘗為大書其居太常胡公

古愚既為賦詩復介吾友呂輔之請記於余余曰竹之
為物詠於詩有切磋琢磨之喻載於禮有釋圓增美之
喻竹蓋異於凡卉草木矣晉王子猷曰何可一日無此
君宋蘇軾亦云可使食無肉不可居無竹也非竹之比
德君子又何以能有於人哉今仲謙氏居有竹亦知有
得於竹而竹為我之有乎若其居有竹而吾不能以有
竹也問其所有輒謾言曰吾吟竹風擊珊瑚也吾掃竹
月披琅玕也雪煙氷雪蔽虧刻無不全於竹也好事者

來引之竹所彈琴詠詩或觴酒以為樂吁有竹如是夫
人而能有之也今夫虛中抱道之心貞標絕俗竹之性
獨建而不拔竹之本離立而不輒竹之羽四時寒暑不
改柯易葉又其恒也聲中律呂協鳳凰之將鳴又其德
音也啼而斑泣而萌動夫嫠人孝子之思是又其應物
之靈也故君子有取於竹而必將有其有也仲謙之得
竹如此斯能有竹之有也不然吾懼仲謙氏居曰有竹
竹不為其有也雖渭川千畝之富徒與千戶侯等云爾

竹何有於居居又何有於竹哉吾問輔之氏稱仲謙好德君子也仲謙其克有其竹不徒在居之云也審矣尚以吾言勉之

聚桂軒記

秀在宋為文物之邦至今士多興於學處廛者亦類皆鴻生碩彥由是廛之坊有曰聚桂者而趙某氏世居焉其子覲尤知尚文墨氏蚤歲尊師取友學經史談道義不間寒暑且題其脩業之所曰聚桂軒軒之前植桂成

行當秋清月高花爛熳發與客觴咏其下悠然與桂相
忘若友然待制杜公本既為書其顏而又因司令濮樂
間氏來見且以記請予惟春而榮秋而悴者木皆然獨
桂貫四時一致不媚於春不怵於秋月窟清寒其根托
焉風霜高潔其英發焉豈非卉之仙者乎宜君子之比
德於桂者衆也古者以桂喻君子如淮南小山之詞蓋
傷賢者不得所而招之以隱者也晉郤洗對武帝曰臣
射策為天下第一猶桂林一枝則又高自標榜而志於

不隱者也余未暇論天下士即秀一郡在宋則有莫氏
五桂者以一門五子皆明經擢第天子賜其親以紫衣
金節之華故人比燕山之竇我朝設科取士則有若黃
氏玘父子俞氏鎮兄弟洎蔡氏景行陳氏允文鮑氏陸
氏景龍徐氏達道歲登賢書皆桂林之選也繼諸君而
來者殆未已焉覲固於諸君之文讀而知之或請業而
師之已他日偕計吏上春官對策大廷天子賜覲進士
第覲將為桂之顯者追榮莫氏以光夫士子之聲豈得

為小山之陰乎聚桂文會方作於樂陶氏余嘗主評裁而士之與是會者人固以欲之桂待之矣觀其可以桂自隱哉余故記聚桂不惟勗觀耳以勗其同門同志者云

桐香室記

秀濮氏某府君居濮津之桐鄉始居成聚已而成市其土廣而墳無高山大谷之深阻所植多嘉樹美箭舊說有梧桐盛大鳳凰常集其上故鄉以名余弱冠時游看

嘗識濮氏樂間公之折節下士尤切切教子弟不遠千里而聘名師其子仲溫好學不勸題其脩業之所曰桐香又取詩人李長吉語以名也後余在吳無有為典市官者日中與市者相質劑夜則歸誦書石轅且嘗道書於余道其所志欲請業焉則知為仲溫余訝其人生紉綺家且既仕而又志學若此非賢者能之乎已而仲溫棄官還家尊師取友以卒其業時余在雲間仲溫又介余友鮑君仲孚招徠予公觴余知止堂上仲溫退侍余

桐香室中相與榜讐經籍商論文墨為事濱別請室記
昔離騷子著書天下香草以比有德之君子傷香草立
愛而不芳者有以而未聞以桐蓋卉之弗靈於性者不
穠於色則烈於香不烈於香則厚於實而已耳惟桐性
靈花之折葉之落占厯者以之而其枝之所傾有以集
鳳凰材之所取又有以中琴瑟詩人者以香屬之殆不
可與凡卉之臭味同議矣故曰桐之香鳳之待也嘻桐
之香鳳之集德香而爵祿聚理之所必至者仲溫植其

德以植桐然自拱把之日無牛羊斤斧之戕勢不至干
霄蔽日不止也根益深蔭益大香益遠吾見仲溫膺爵
祿也天子賜進士第起身以顯揚其親以展布其平日
師友之學可計日而候已故余樂為記桐香使人知桐
香非直為待鳳之其實濮氏之德之符也繫之辭曰梧
桐生矣在濼之陽桐之香只繫鳳之翔繫鳳之翔惟君
子之鄉梧桐培植只在濼之除桐之香只伊德之符伊德
之符維君子之居

明誠齋記

淞之南五十里其中水曰大泖水清而土墳環泖而居者多聞家著族歲治土田給貢賦外不遠千里聘名師教子弟最者曰朱陳邵呂有曰武叔者蓋邵氏之佳子弟也予嘗聞武叔兄文伯高爽而好學一時功夫樂與之游不知又有武叔競爽焉武叔事父兄各極其道事師尤不遺於禮且聞脩業之所題曰明誠蓋以暇日誦書史其中所以交當世之賢人君子必此焉游息而聲

色狗馬之好一不以經意鄉之先達無不罷許之間從
外舅倪伯玉君來見且請言以著明誠余喜淞子弟多
嗜學而邵氏余不無棄取然極其至而論則聖人之道
一誠也天地之運一誠也天地一息不誠天地之運歇
聖道一日不誠聖人之道消聖法天賢法聖明此爾誠
者誠此爾聖而無不明孔子之徒是也賢明而無不誠
顏曾之徒是也明則知誠則行也易曰知至至之所與
幾也非明之始事乎知終終之所與存義也非誠之終

事乎譬諸過都者必知道所由陸轅太行水航滄汝不
惑於天下之旁岐斷港然後星行夜宿積日累月斲于
達而後止此非明誠始終之教歟故明誠之功極于天
地位萬物育聖人之道于是焉與造化同流於乎至矣
武叔即予說以合中庸之論而用力焉余他日究子所
成以徵子學之不自欺者的不予妄也大師道而光祖
德者不在武叔之祖為翠岩老人者余所愛敬也其師
東岡先生余所友也武叔歸而質之以為何如

溪居琴樂軒記

古樂器之存惟琴琴蓋古聖人有道之器而至樂存焉
故顏淵得聖人之道而託之琴也陶潛得聖人之趣亦
託琴也師曠嵇康阮瞻之徒非不工於琴藝而已耳道
也趣也其樂內也聲有可也無可也藝者其樂外也聲
不得而無哉松陵曹某氏闢室一所前俯六溪暇日鼓
琴於其口題曰溪居琴樂間從陟百經氏來謁記予惟
琴雖古樂今之琴絕與古反矣古人樂於內今人樂於

外也善琴者有倚蘭白雪離鸞舞鶴御風騎古操之製
也不知古操之製古道之所託也今之紈袴小生笄珥
婦女以勞為學者徃徃務為新聲以悅今耳是列雅於
鄭衛之音何有乎古聖人之至樂哉予嘗聽氏琴已曹
氏獨好純古淡泊之音寬於內好足以舒焦衰湮鬱之
疾則於顏之道陶之趣其得否即於此中寓之非後世
紈袴小生笄珥婦女者比也不樂於聲則於樂道似矣
抑吾聞伯牙氏之學於連城是也置之絕島之間觀風

水之瀕洞山林之杳鳥悲獸號之慘情一移而琴遂最
天下曹氏之居溪上也流水終日號號鳴階除聞若金
石交作而清奏鈞韶也高陵大埠烟雲晦靄在窗戶外
其朝夕之變不同也即物家之變而寫之於琴吾知其
符連成子之教矣吁是道也又豈紈袴小兒笄珥婦女
以吟猱攫醪習於工師之樂學以為樂者哉子它日拿
舟過溪上聽太古之音以見聖人於穆然頎然之間尚
當為汝賦其樂云

桂隱記

至正九年春予赴璜溪呂氏塾之賓塾與其仲氏德昭甫隣德昭甫闢室居之西偏植桂數十本顏之曰桂隱嘗觴予桂隱所因求記余謂山林之士托草木之芳以隱者多矣或以菊或以蒲或以瓜或以松或以竹以梅以橘以李以槐者不一足也而以桂記隱者鮮聞德昭甫其亦有慕於劉安氏之小山者乎安輕國位與山澤之儒游八公之徒為賦小山之詞其招隱有曰山氣籠

從石嵯峨溪谷嶄崿水增波猿狖羣嘯虎豹嚙攀援桂
樹聊淹留知桂之所記在岩谷斗僻之地足以為君子
隱所也今德昭甫之居無石之嵯谷之岩猿狖羣居而
虎豹曹也桂之列在庭其途人所見且引好事人抵其
所得為小山之詞之隱乎德昭曰吾取桂以德不取桂
以地故曰桂因地生不因地桂且桂月窟之產也兔公
蟾母之所托以為隱者固非人間世之所得有間有在
人間世者不幸為墨卿詞客資之為決科取祿計遂名

為科籍豈桂本志哉歌隱于小山者必于桂是言蓋知桂者無如小山矣桂不以無人而不芳君子不以無信而改德易行也吾有志於桂如是何暇計隱之山不山也哉抑又聞小山之詞招隱耳非有隱也德昭甫尊德樂義雖老而好學不倦吾見中朝之士方有續騷歌而招德昭者德昭其得終隱於桂乎是年九月十日記

水南軒記

家華亭長泖之陽其里曰胥浦世以孝友之行脩于家

而以義方教子弟者曰陸宗敬氏即其居之偏而顏之水南者則其彥功燕處之所也陸氏自吳婁侯遜開迹華亭大司馬抗有平國功二子曰機曰雲又以文章著名於世且姓其小字於山川故子孫氏至今千有餘年猶魁然以人門為淞聞族士衡之詩曰髣髴谷水陽谷水即長淞也蓋其生之所樂去之異鄉而不忘歸志不遂卒有感於華亭之清嘯也嘻谷水不遷亭鶴自語里人至今思而悲之今彥功有先之序在谷陽而名其軒

曰水南上有垂白之親下有舞襦之童又有賢師良黨之際樂其樂而不知世有崇高權貴炎冷榮悴之一去一來者倚於高山流水之外同志相過索其人於水之南相與論道名理為事此豈紈袴少年之情哉可以稱二陸之鄉之賢俊氏賢彥功賞隨其師黃公子謁余璜溪其識其人高朗有雅量吾已喜其為陸氏佳子弟矧又成之以賢師友之學抑余宗敬有才而不得究於高年其報在子孫彥功當有以顯其先矣嘻綿華事之世

澤補遐祖之初志其又不在彥功乎彥功以余言勉之而已

耕閒堂記

予嘗評閒矣有仕而閒有耕而閒有游於仕農之外而閒游於仕農之外者其閒不容於先王之世吾置而勿論也若既仕而丐閒者事若優而情或有未知則閒亦謾爾惟耕有餘力而後閒迹若苦而情優非世俗之閒有所矯激而後得者比已雲間倪仲玉氏不仕而歸農

名其所居堂為耕閒農之暇雞肥豕蕃家所釀谷作春
輔會不閱月而熟仲玉作輔會必與親戚故舊相共之
迨極夫琴歌咲詠之樂而後止胸中廓然無一物之留
戶內外熙熙然無一世故之撓非吾所謂迹若苦而情
至優非世俗之間有所矯激而後得者耶仲玉且自記
曰吾祖從御史大夫其亦農耳其勞至帶經而鋤計其
閒不如吾之耕餘及其耕而仕也閒益不得假吾之閒
不廢於耕而經亦不廢於吾子孫吾非太平之幸民先

德之慶裔歟余客呂氏塾而仲玉之堂為余塾南隣且
嘗與觴豆堂上遂以記請甫田之詩曰琴瑟擊鼓以御
田祖以穀我士女余亦將休矣買田三泖上與子孫為
耕耦暇則與子孫拊格相擊土鼓以祀先嗇之祖而且
有以式穀吾之士女也豈非甫田詩人之樂哉爾祖得
失吾又何議仲玉喜而起自歌曰仕而閒其志煩其情
艱其情而閒其志安其體胖乎吁嗟閒先于吾豈以耕
之寬易仕之慳乎

舊時月色軒記

松陵陸子敬氏吳大族也宋景咸間子敬之先嘗築侯
老堂於分湖之北壘石為山樹梅成林日與魁人碩彥
觴咏為樂沒百餘年而子敬克守其業又葺所居之軒
名之曰舊時月色取姜白石詞語也書來以此記請予
惟古今人幾生幾滅古今月幾圓幾缺人有古今之殊
而月未始有古今也月與天地一無窮之運亘古猶一
日也人不與月存則謂人舊而月新月不與人生則又

謂月舊而人新也白石為范石湖氏出仕于朝歸老于家也時異事改求昔日之所見者唯月在梅耳待酒相對悅如遇故人於數十年後豈不有舊月之感哉子敬是之不忘其先見月於梅如見其先宜其同一感也然草木以時計閱歲而一新舊也堂池以歲計閱世而一新舊也月一古今而無敝故體有盈虛而卒莫之消長時有升降而卒莫之始終也豈一草一木一池臺之新舊而得為月之新舊乎雖然天地一物也月一天地一

物也其生無死蓋亦有數焉朔而載明于西晦而終魄于東此月之生死候一旦暮耳先天而生明之根後天而及魄之極此月之一大生死亦一旦暮而善觀月之生死可以知屈伸之義矣吁是豈石湖氏觚墨之客所能言哉異時予將泝三江過垂虹訪子敬之所居呼酒酌東軒上歌長庚之詩以問月自玄黃判而月生者今幾年以今人而能存古月者復幾何人君當酌月而壽我我固中舊客也

東阿所記

按隴西志東阿谷在醉仙山隱者所棲也氣清境勝草木繁蕪此少陵杜氏屢見于歌咏而不厭也其詩有曰船人近相報但恐失桃花陵蓋以其景比之桃源矣松之南里曰璜溪溪之上馮生濟世家焉生於廬之東又治讀書室顏之曰東阿夫東阿去秦地數百里而生以之名者取景同不取地同也地有水竹之美在璜之東隩軒又東嚮謂之東阿固宜當夫朝陽方升萬景焜

耀鳴雞在樹喔喔然白鵝蒼鷺與文勅鳥在水者泛泛然陽陂打蔬者數十品瘦地少粟者五種熟高人逸士時過其所詬租更叫囂東西村如隔島外也未知居東阿數十家者比生何若哉昔少陵氏之咏東阿非實居也使少陵實從東阿遭世擾攘妻子流離拯死之不贍雖有東阿能一日居乎今生生於全盛之時又無仕宦東西之榮優游焉誦詩讀書於阿之所暇則杖策溪上觀片雲雙鳥其悠然自得蓋與東阿之詩人同一遠意

而非衆人之所能測識矣夫彈絲有得不必琴臺流觴
有水不必蘭亭東阿有隱者之東又何必曰醉仙之谷
哉書諸解為記又為賦詩曰問君讀書所我所在東阿
東阿何所有水竹蔭陂陀鶯羽飛雉雉長頸鳴鴛鴦離
離原上颺濯濯池中荷桃源在人世豈必陽山阿今
日有良會同志式相過擷我園中蔬具酒旨且多請君
考吾槃和我軒中歌

中山堂記

秀澤國也出郭無山許可久氏居城東門外顧書其堂
楣於中山介予友陳德初見予舍次且請記惟洛為地
中而嵩山天下之中山也可久家去洛凡幾何里隔嵩
凡幾何山烏睹太室少室三十六之峰乎可久曰吾家
許由君實隱中山繇龍門南有山高丈四絕諸峰下立
如引頸仰其峰之高者至今字之曰許云孔子生魯稱
殷人太公仕周不忘乎營丘重本也吾不居洛而稱洛
中山豈徒慕中山也哉嗚呼重本若可久氏者可已雖

然吾嘗病君家許由君悻悻然獨潔其歸不肯入堯舜之道非盛時所望也吾聞天地扶輿英淑之氣聚于中州而州中之山惟嵩當之王治將興嵩必為降祉生英佐故詩人歌之曰嵩高維嶽峻極于天維嶽降神生甫及申中山之利于時若此可久追本中山其徒尚夫遜歟抑有以應詩人之歌歟是為記

遂初堂記

鵲李東去六十里為鸚湖又航湖而南六七里為趙君

初心之家君故宗正子姓也嘗以今選異等遇知天厯
大臣涼國公轉官至羅羅斯甸宣慰都事循是而往躡
高據要可計日待君顧自畫之行年六十而以老自休
稍為園池樹堂其中曰遂初因余友劉漢傑請記余既
高君之尚遂弗辭人心之良莫良於其初而有不能良
者蝕其初焉耳故君子論心恒尚初雖既老而貴乎遂
也晉孫興公負一時清名嘗自賦遂初詩弗克遂強預
家國事取專政者嫌薄君年六十六未致事一旦若悟

五十九之非執政者方倚用之而居且休矣精神志慮
卷為也有視存利祿若涕唾盡分由四子而家督者受
政君勝日挾侍者數人與鄉之宦而歸者往還扁舟間
好事者時載酒戶外君握手堂上說舊時典故辨古先
名理驩甚慷慨激烈發為歌詩比之晉士取人嫌薄而
訖不遂初蓋異日道也且其言曰堂之築固以休予老
而遂吾初而吾初之遂者實將以竟吾母夫人之驩柰
何堂成而母逝矣今吾雖若顓堂以居而不知吾心之

恒有母也嗟乎與生俱生者愛親之仁而初心之至也
又未知晉士之初有是不也是可記已又從而歌之鸚
之湖兮清且腴溉我田疇兮烏鹵為禽出有航兮食有
魚歸歟歸歟我親我娛親雖逝兮我心在廬遂吾遂兮
我心之初遂兮烏知其餘

晚軒記

秀有芻水世家為戚秉肅以晚自命所居之軒且告予
曰某之名軒非以芻水宜晚之景也某不幸幼為膏粱

兒重不幸早孤以冠齒當家督里中豪少我弱我攻取者四面至而學日與家落孔子謂三十而立今踰去其年而吾未之有立也不其晚乎故名以自儆幸先生有以教我夫物脆於早而固於晚脆則薄固則厚物之理也人之成器何獨不然故老氏有言大器晚成名言也子不觀夫藜藿與梗楠豫章乎藜藿之生煥煥然一日拔數寸而其材不可以為櫨梗楠豫章長歷七年而後一覺而其用可舟楫梁棟速成者其功劣晚成者其功

大其象已乎誠有志於器之成也何嫌於晚乎余交秉肅氏得詳其性行才質皆晚之器世之士多尚狎和而秉肅獨以介尚巧言詐行而秉肅獨以直尚險奔而污竟而秉肅獨以夷以潔也是得晚之道也然彼以速為功者足高於連嶺列埒之間峻躋而極誨自謂高鳥快駿不能踰不知足一躓則盲妄擿埴顛隕於陷穽而不知有援而救之者則其為速莫晚甚焉余之進若晚而他日功成名立訖為大器則彼之速者莫我追也已子

以余言勉之余未老且將卜隣亭水上尚及見子之成
於晚也

顧氏永思冢舍記

襄陽顧必有之六世祖宋大八將府君某與其曾大父
興能府君某大父檢閱府君某暨傍親墓林在越諸暨
花山鄉之文山至正六年夏四月辛酉必有又葬其妣
孫夫人于域次既葬作室於墓左之南若干步以奉其
先世及妣孫夫人神主俾邑人何壽者亭之凡春秋祭

祀冢舍之政皆有著式室大小凡五間既成名之曰永思冢舍蓋取諸下武詩永言孝思孝思維則也而又因吳興沈自誠氏見予吳門特記惟孝之為義大矣為人子者生盡其愛敬死盡其哀戚可謂孝矣然親在則禮興親沒則哀戚之情日遠而日忘者人之常也非資如大舜為純孝之全則不能終其身而慕焉故君子設教懼其久而或忘也為墓於郊而封溝之為廟於家而嘗禘之為衰為忌而悲哀之所以致其思思存則親雖遠

其能忘乎或曰墓祭之禮君子所弗予也予惟謂親之手澤口氣在器物者尚能動其思慕致其哀戚而不忍用也況冢墓親之體魄所在乎升高而望松楸下丘隴而行虛墓之間榛棘淒然霜露時降君子於此其有不戚然連其思者乎思之永則親之沒雖百歲之久猶一日也吾聞顧君者親喪不忘常廬居於冢側會有四方之事又治精舍以守之可謂永慕之至者其先有永慕亭在墓下思敬亭在墓南八十步皆為祭享所歲久傾

圮今舍名永思蓋亦無忘先亭而繩其義者歟嗚呼顧氏子孫雖遠去墳墓散處于四方也然於其親色未嘗絕乎目也聲未嘗絕乎耳也志意嗜欲未嘗忘乎心也其於永思之義庶幾其無忝已是為記

思亭記

姑胥王斌氏早孤事其母賈謹甚為無錫州屬吏迎其母就養每雞鳴起溫言色朝其母始出夕復夕母躬上食母扣吏事斌白所行善母說即不善母為減眠食斌

母體順其行事益畏恭母病斌衣不解帶自不交睫侍藥食母沒斌執喪哀慟骨立吳俗葬其親以火斌惻然追傷其父不及營輒穴衰經具棺葬母閭門外之原復築亭原上名曰思服踰祥酒哀泣如始喪且跣來乞余以記其所不忘者余謂后山陳氏嘗記甄君之思矣雖然陳以目視其心之思推其戒於不肖者異思時為庸人言之爾君子者不然霜露既降君子屢而愴焉雨露既濡君子履而惕焉思其親居處思其親咲語又思其

親所嗜所樂思其存存則著著存之至若將見之此君子無時而無其親者也無時而無其親雖親在九土不在九土故思非物自外至者根中出者思根中出不在登高而望松梓下丘隴以行虛墓而後有之也夫物之係於見不見者存亡以目而存不係於見而不見者其惟思乎嗚呼此君子之孝思也弑事親有至性又志乎學古者其於君子之孝思庶矣若曰見亭始思亭去則思去思不能存終勤以慎行夫身以圖榮其親豈君子

望於其親君子望於斌乎斌起拜言曰斌不肖敢不恭
敬先生教以終君子之孝云



東維子集卷十七